

ԳՈՐԾՆՎԵՐՆԵՐԻ ՀԵՏ ՀԱՄԱԳՈՐԾԱԿՑՈՒԹՅԱՆ ՀԱՍՏԱՏՄԱՆ (ԳՈՐԾՆՎԵՐՆԵՐԻ ԸՆՏՐՈՒԹՅԱՆ) ՍԿԶԲՈՒՆՔՆԵՐԸ

Ընկերության Խորհրդի որոշմամբ Ընկերությունը կարող է համագործակցել այն վարկատու կազմակերպությունների հետ, որոնք պատրաստակամություն են հայտնում և Ընկերության հիմնավոր կարծիքով ունակ են տրամադրել Ընկերության կողմից Սպառողական վարկերի վերաֆինանսավորման կարգով (Կարգ) սահմանված պահանջներին բավարարող սպառողական վարկեր, որոնց ֆինանսական վիճակը թույլ է տալիս ենթադրել, որ դրանց կայունությունը մոտ ապագայում չի վատթարանա, և որոնք ընդունում են Ընկերության կողմից սահմանված համագործակցության պայմանները: Բացի վերը նշվածից, Ընկերությունը համագործակցում է այն ֆինանսական հաստատությունների հետ, որոնք բավարարում են կորպորատիվ կառավարման ընդունված սկզբունքներին, ինչպես նաև ունեն ներդրված ռիսկերի կառավարման պատշաճ համակարգ:

Ընկերությունը կարող է սահմանել գործընկեր ֆինանսական հաստատությունների ընտրության լրացուցիչ չափանիշներ:

Հայաստանի Հանրապետության տարածքում գործող բանկերի կողմից համապատասխան դիմում ստանալու դեպքում Ընկերությունը վերջիններիս տրամադրում է Կարգը (ներառյալ բոլոր հավելվածները), ինչպես Կարգի 4.2 կետով սահմանված նոր ԳՖՀ-րի ընտրության լրացուցիչ չափանիշները և կարգը, եթե այդպիսիք սահմանված են տվյալ պահին, և համագործակցության վերաբերյալ որոշում կայացնելու համար Ընկերությանը ներկայացվելիք անհրաժեշտ փաստաթղթերի ու տեղեկատվության ցանկը, դրանց ներկայացման ձևերը՝ համաձայն Կարգի [Հավելված 1-ի](#):

Ընկերության հետ համագործակցության համար բանկերը գրավոր դիմում են Ընկերությանը, նշելով որ իրենք ծանոթ են Ընկերության կողմից սահմանված պահանջներին ու ընդունում են դրանք և կից ներկայացնում են Ընկերության կողմից պահանջվող փաստաթղթերն ու տեղեկատվությունը:

Ընկերությունը 5 (հինգ) աշխատանքային օրվա ընթացքում ուսումնասիրում է ներկայացված փաստաթղթերը և պատրաստում է տեղեկանք՝ Ընկերության Խորհրդի նիստին ներկայացնելու համար: Դիմող կազմակերպության հետ համագործակցելու վերաբերյալ հարցը քննարկվում է Ընկերության Խորհրդի առաջիկա նիստի ընթացքում: Ընկերության Խորհրդի դրական որոշման դեպքում Ընկերության գործադիր տնօրենը միջոցառումներ է ձեռնարկում դիմած կազմակերպության հետ հնարավորինս սեղմ ժամկետներում ԳՎՊ կնքելու նպատակով:

Ընկերությունը առաջարկում է մերժել ԳՎՊ-ի կնքումը համագործակցության նպատակով դիմած հաստատության հետ, եթե.

- Հաստատությունը ամբողջությամբ չի ընդունում Ընկերության կողմից սահմանված պահանջները,
- Հաստատությունը չի համապատասխանում Ընկերության կողմից սահմանված պահանջներին (այդ թվում՝ կորպորատիվ կառավարման և/կամ ռիսկերի կառավարման համակարգի գծով),
- Ընկերության միջոցների հաշվին սպառողական վարկավորման կանխատեսումները չեն համապատասխանում (հակասում են) Ընկերության որդեգրած քաղաքականությանը,
- Հաստատության կողմից ներկայացված տեղեկատվությունը արժանահավատ չէ:

Անհրաժեշտության դեպքում Ընկերության աշխատակիցները կարող են հանդիպել համագործակցության համար դիմած հաստատության ներկայացուցիչներին՝ որոշում կայացնելու համար լրացուցիչ պարզաբանումներ ստանալու նպատակով:

Ընկերության Խորհրդի որոշմամբ Ընկերությունը կարող է սահմանափակել իր հետ համագործակցող հաստատությունների քանակը: Համապատասխան որոշում կայացնելու դեպքում Ընկերությունը հայտարարում է նոր հաստատությունների հետ ԳՎՊ կնքելու ժամանակավոր (անորոշ ժամկետով) դադարեցման մասին:

Ընկերությունը կարող է իր հետ համագործակցող կազմակերպություններին ընտրել մրցույթի միջոցով, որին կարող են մասնակցել ՀՀ տարածքում գործող բանկերը: Մրցույթ կազմակերպելու դեպքում ընտրության հիմնական չափանիշներն են ֆինանսական կայունությունը և Ընկերության նպատակների ներքո սպառողական վարկեր տրամադրելու պատրաստակամությունն ու ունակությունը: Ընկերությունը կարող է մրցույթի համար սահմանել լրացուցիչ չափանիշներ:

Ընկերության և գործընկերներ ֆինանսական հաստատությունների համագործակցությունը անժամկետ է, եթե այլ բան նախատեսված չէ ԳՎՊ-ով:

Անկախ ընտրության ձևից Ընկերությունն իրավունք ունի ամեն տարի վերահաստատել ԳՖՀ-ների մասնակցությունը: Վերահաստատման չափանիշները սահմանում է Ընկերությունը, հիմք ընդունելով համագործակցության նախորդ փորձը և այն չափանիշները, որոնք ընդունված կլինեն Ընկերության կողմից վերահաստատման պահին:

ԳՖՀ-ների գործունեությունը վերլուծելու նպատակով Ընկերությունը կարող է ԳՖՀ-ներից պահանջել վերջիններիս գործունեության վերաբերյալ որոշակի տեղեկատվություն:

Ստորագրելով ԳՎՊ՝ ԳՖՀ-ը պարտավորվում է Ընկերությանը հասանելի դարձնել վերաֆինանսավորված/վերաֆինանսավորման ներկայացված վարկի վերաբերյալ ամբողջական տեղեկատվությունը ինչպես վերաֆինանսավորման վերաբերյալ որոշում կայացնելու համար, այնպես էլ վերաֆինանսավորումից հետո, սպառողական վարկի ամբողջ ժամկետի ընթացքում:

Ստորագրելով ԳՎՊ՝ Ընկերությունը չի պարտավորվում վերաֆինանսավորել իրեն ներկայացված Որակավորված սպառողական վարկերը յուրաքանչյուր ներկայացման դեպքում, և ելնելով Ընկերության առկա միջոցների ծավալներից և/կամ իր ռազմավարական խնդիրներից, Ընկերությունը կարող է ժամանակավորապես (անորոշ ժամկետով) դադարեցնել ԳՖՀ սպառողական վարկերի վերաֆինանսավորման գործընթացը: Այդ մասին որոշում կայացնելու դեպքում Ընկերությունը որոշումը կայացնելուց հետո հինգ աշխատանքային օրվա ընթացքում հայտնում է բոլոր ԳՖՀ-ներին:

Ֆինանսական հաստատությունների կողմից Ընկերությանը ներկայացվող փաստաթղթերի ու տեղեկատվության ցանկը և ներկայացման ձևերը

1. Հաստատության իրավասու մարմնի որոշումը՝ համագործակցության Գլխավոր Վարկային և Ցեսիայի պայմանագրեր կնքելուն հավանություն տալու վերաբերյալ, եթե նման պայմանագրերի կնքման որոշում ընդունելու լիազորությունը օրենքով կամ հաստատության կանոնադրությամբ չի պատկանում հաստատության միանձնյա գործադիր մարմնին,
2. Այն պաշտոնատար անձանց անունների ցանկը, որոնք հաստատության կողմից լիազորված են հաստատության անունից փաստաթղթեր ստորագրել (կնքել), ինչպես նաև այդ պաշտոնատար անձանց ստորագրությունների նմուշները՝ հաստատության իրավասու պաշտոնատար անձի վավերացմամբ,
3. Հաստատության սպառողական վարկավորման կարգերը,
4. Հաստատության սպառողական վարկերի փաստացի պորտֆելը վերջին երեք տարիների ընթացքում՝ ըստ ներքոնշված աղյուսակի: Աղյուսակը լրացվում է ՀՀ դրամով, ժամանակահատվածի վերջի դրությամբ.

Ամսաթիվ	Գումար		Քանակ	
	Ընդամենը	-այդ թվում դասակարգված	Ընդամենը	-այդ թվում դասակարգված
Առաջին տարվա դեկտեմբերի 31-ի դրությամբ				
Երկրորդ տարվա դեկտեմբերի 31-ի դրությամբ				
Երրորդ տարվա դեկտեմբերի 31-ի դրությամբ				

5. Հաստատության ռազմավարությունը սպառողական վարկավորման շուկայում առաջիկա տարվա ընթացքում, այդ թվում Ընկերության կողմից տրամադրվելիք միջոցների հաշվին սպառողական վարկերի կանխատեսվող ծավալները, պայմանները: